

PRINS PEGASAYA Y PANCHO BRINGAMOSA A TUMA GOBIERNO

ORANJESTAD, 15 Feb. - Diadomingo mainta banda di diez or a tuma lugar na residencia di gezaghebber Oscar S. Henriquez tumamento di mando over for di e gezaghebber door di prins Pegasaya (Guy Paris) y Pancho Bringamosa (Federico Oduber). Na e ceremonia aki tabatin representantenan di comite Central di Carnaval 1965, bao di gia di presidente Milo Croes.

E grupo a reuni promer hunto na Trocadero pa despues acompaña pa steelband dirigi nan mes na cas di gezaghebber caminda nan a worde ricibi. Senor Milo Croes a pidi gezaghebber pa ta asina bon pa pasa mando over pa prins y su pancha pa durante di temporada di carnaval nan gobierna e isla. Gezaghebber a declara di gustosamente kler pasa e carga pisa di gobiernacion arriba e schoudernan di prins. Alavez ela declara di ta spera cu e prins sabi loke e tabata haci y adesea esaki hopi exito. Despues di a entrega e yabi di e isla na e prins Pe-

gasaya su pancha a lesa e proclamacion cual ta lo siguiente:

Amie, esun, e unico, pa boluntad di mi subditanon di mondi cadushi di mondi Liki Lokki, prins Pegasaya, descendiente di shon Lena Shorshori Sangura, Jerba di Patataca, Jerba di Vruminga y Jerba di Grawatado. Primogenito di su altesa prinse-sa Piki Pleuw, Jui baron di e gran tirado di stichi y comedo di lenga di prickichi, defensor di santaneronan na Juana Morto, protector di e minanan: Laga Bida, Laga bai, Laga cai, Teneman,

Kibrabus., autor huramenta di e obra famoso Locologia, maestro den legan di Patrishi, profesor den fondo di Butishi, ami, esun e unico prins Pegasaya, Pega Boton, Pega Pega di Juana Morto. Etc., etc., etc., ta proclama: Pa di prome: Cu e proclamacion aki lo worde lesa cu stem di Toteki pa Pancho Bringamosa, protector di Boonchi Strena, Pancho Unico, calbas rondo, sirbidor di prins Pegasaya, pero no pega na su saya.

Pa di dos: Cu durante dianan venidero lo reina riba Aruba un Pegasaya y un Bringamosa.

Pa di tres: Cu pues Pegasaya lenga di lagadishi, pega na saya di Shi Maria cara di cadushi, lenga di sumpinja, lo tuma over gobierno di Aruba pa reina den locura di otro mundo, nos mundo. Pa di cuater: Cu ta ser garantiza un reinado di pega na tur saya y bringa tur mesa.

(Sigui lesa pag. 8)

8 PRINS Y PANCHO A TUMA GOBIERNO

(Continuacion di pagina 1)

Pa di cinco: Cu ta ser garantiza na pueblo di Aruba Pahn cu shoshoro.

Pa di seis: Pero sin grawata y sin yerba di chubato.

Pa di siete: Cu ta ser garantiza na nos posibel enemigonan: Jerba stinki, Wabi Wabi mondi un seriedad eterno.

Pa di ocho: Cu despues di nos mes, ta nos mes. Pega Saya y Bringamosa.

Pa di nueve: Cu e jabi lo worde segura, warda, mimu y caricia manera sumpinja skerpi.

Pa di diez: Cu pa no tin kibo'acion, ta worde strictamente pro-

hibi pa jambo bieuw bolbe na weya.

Pa di diez y un: Cu despues di nos, pues, nos mes Pegasaya y Bringamosa.

Duna dia 38 di luna di Lokki Lokki na Aruba pueblo di pega saya, esun, e unico y bringa mosa, no pega na su saya.

Biba Boonchi Strena.

Despues di e proclamacion aki, a sigui un drink ofreci pa e "ex-gezaghebber" na e gobiernantenan nobo prins Pegasaya y Pancho Bringamosa hunto cu e otro presentenan.

Una bez cu e seremonia a termina, e dos gobiernantenan nobo a cuminsa cu nan parada door di Aruba, acompaña pa varios steelband.



Diadomingo mainta ultimo pa diez or a tuma lugar na Residencia di Gezaghebber O.S. Henriquez e tumamento over di mando door di Prins Pegasaya y Pancho Bringamosa for di Gezaghebber. Esaki a tuma lugar den presencia di e comite Central di Carnaval y otro interesadonan. Aki nos ta mira Bringamosa ta haciendo su proclamacion. Den centro Pegasaya ta escuchando cu yabi di e isla den su man, mientras Gezaghebber ta tendiendo ta kiko e dos caballeronan aki tin intencion di bai haci cu su gobierno.